

**Naalakkersuisut kingusinnerpaamik UKA 2018-mut ileqqussaasunik
siunnersuisooqatigiinnik pilersitsinissamat siunnersuusioqqullugu Inatsisartut
aalajangiiffigisassaattut siunnersuut.**

*(Inatsisartunut ilaasortamit, Bendt B. Kristiansenimit, Inuit Ataqatigiit,
saqqummiunneqartoq)*

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Nivi Olsen, Demokraatit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Mala Høy Kuko, Siumut
Inatsisartunut ilaasortaq Aaja Chemnitz Larsen, sinniisussaq, Inuit Ataqatigiit
Inatsisartunut ilaasortaq Peter Olsen, sinniisussaq, Inuit Ataqatigiit
Inatsisartunut ilaasortaq Bendt B. Kristiansen, Inuit Ataqatigiit

UKA 2017-imi ulloq 17. oktober 2017-imi siullermeerinerup kingorna ataatsimiititaliap
siunnersuut sukumiisumik misissorpaa.

1. Siunnersuutip imarisaa siunertaalu

Aalajangiiffigisassatut siunnersuutip saqqummiunneqarneratigut kingusinnerpaamik UKA
2018-imi nunatsinni ileqqussaasunik siunnersuisooqatigiinnik pilersitsinissaq pillugu
inatsisissatut siunnersuummik Naalakkersuisut saqqummiussinissaat inatsisartunit
tapersorsorneqarnissaa siunnersuuteqartup kissaatigaa.

Ileqqussaasunik siunnersuisooqatigiiffik qanoq atuuffeqassanersoq pillugu siunnersuummi
siunnersuuteqartup isumaliutigaa, taamatuttaaq siunnersuummi pineqartumi ileqqussaasunik
siunnersuisooqatigiiffimmi ilaasortat qassiunissaat kiisalu ilaasortanik toqqaasarnissaq
piginnaasariaqakkanillu siunnersuuteqartoq saqqummiussaqrpoq.

2. Siunnersuutip Inatsisartunit siullermeerneqarnera

Nunatsinni ileqqussaasunik siunnersuisooqatigiinnik pilersitsisoqartariaqarnera siullermeerinermi annertuumik isumaqatigineqarpoq.

Ileqqussaasunik siunnersuisooqatigiit suliassaat, siunnersuisooqatigiinnut, aalajangiisartutut ataatsimiititalianut, kattuffinnullu atuutereersunut atatillugu tulluarsarneqarnissaa kiisalu ileqqussaasunik siunnersuisooqatigiit politikikkut suliaqarnermi attuumassuteqartussaannnginnera Naalackersuisut akissuteqaamminni erseqqissaatigaat.

Ileqqussaasunik siunnersuisooqatigiit siunnersuisuusariaqartut allanillu isumagineqanngitsunik oqallinnernik pilersitsisassasoq Naalackersuisut ilanngullugu oqaatigaat. Napparsimanermut attuumassuteqartunut katsorsaanermilu ileqqussaasunut attuumassuteqartut arlallit saniatigut ileqqussaasunik siunnersuisooqatigiit assersuutigalugu inuiaqatigiinni ileqqunik ileqqutoqqanillu paqumigisaasunik sammisaqarsinnaavoq.

Ileqqussaasunik siunnersuisooqatigiit katitigaanerannut tunngatillugu Siumup saqqummiuppaa, nunaqarfiit nunaqarfimmiullu pillugit ilaasortat ilisimasaqarnissaat qulakkeerneqartariaqartoq, taamatuttaaq kalaallisut oqaasilinnik ilaasortassanik toqqaasooqartarnissaa Siumumit oqaatigineqarpoq.

Ileqqussaasunik siunnersuisooqatigiit atuuffissaanut tunngatillugu suliassarpassuaqartoq Inuit Ataqtigiit saqqummiuppaat. Nunatsinni innuttaasut – Inuit – oqaluttuarissanikkut ileqqutoqaqarput ullullu nutaanngoriartorfiit nutarterinerillu inuuffigalugit, najoqqutassanik, ileqqutoqqanik inooriaatsinillu unammilligassaqarfiusut atorlugit, taamaattumik ileqqussaasunik siunnersuisooqatigiit apeqqutinik isumaliutinillu innuttaasunut iluaqutaasussanik suliassarpassuaqarput. Aamma innuttaasut pinngortitalu ataqtigiinnerat ileqqussaasunik siunnersuisooqatigiit sammisinnaavaat.

Ileqqussaasunik siunnersuisooqatigiinni periarfissat Demokraatit aamma takusinnaavaat, naalackersuinikkulli suliaqarnermi attuumassuteqannginnissaanik siunnersuuteqartup siunnersuutigisaaniit annertunerusariaqartoq oqaatigalugu. Ileqqussaasunik siunnersuisooqatigiinni ilaasortassanik Naalackersuisuniunngitsoq toqparneqartarnissaat akissaasersuinernullu tunngasut allaffeqarfitsigullu sullinneqarneq sukumiinerusumik oqaluuserineqartariaqaraluartut Demokraatinit kissaatigineqarluni. Allannguutissatut siunnersuuteqarsinnaanissamut ileqqussaasunik siunnersuisooqatigeeqarnerup iluaqutitai/ajoqutai aallaavigalugit nalilersuinissamut Demokraatit ammapput.

Taamaalilluni ataatsimut paasinarsivoq partiit Siumut, Inuit Ataqtigiit aamma Partii Naleraq siullermeerinermi oqaaseqaatiminni siunnersuummut tunngaviusumik tapersersuisut. Siunnersuummi periarfissat Demokraatinit aamma takuneqarsinnaapput siunnersuutilli

sukumiisumik suliarinera tunngavigalugu inerniliussassaq naliliivigiumaarlugu innersuussiumaarlutillu.

Tamanna tunngavigalugu siunnersuutigineqartoq Ilaqutariinnermut Peqqissutsimullu Ataatsimiititaliami sukumiinerusumik nalilersorneqarnissaanut innersuunneqarpoq.

3. Ataatsimiititaliap siunnersuummik suliaqarnera

Siunnersuutip siullermeerneqarnermini piumassuseqarluni isumassarsiorfiunera ataatsimiititaliap suliamik nangitsinissaminut tunngavissiisoq ataatsimiititaliamit iluarineqarpoq.

Ileqqussaasunik siunnersuisooqatigiit inuiaqatigiinni oqallinnermi kinaassutsimik pilersitsiviusumik kinaassutsimillu oqallinnermik pilersitsisinnaasoq qularnanngilaq, matumani paquminartut oqaatigineqarsinnaasalissallutik inuiaqatigiinnilu kalaallinit ujjartorneqartut annertutigisumik eqikkarneqarlutik, uummarissarneqarlutik inerisarfigisinnaasaat, matumanilu innuttaasut kinaassusaannut ataqatigiinnerannullu kiisalu kulturikkut, ileqqunut nutaaliernerillu ataatsimoortinneqarsinnaalissallutik.

Aalajangiiffigisassatut siunnersuut una eqeersimaartumik ineriartornermut, eqqarsarnissamut inatsisissamillu suliaqarnissamut inaarsaanertut ileqqussaasunik siunnersuisooqatigiit inaaruataasumik maleruagassiuunneqarnissaanut tunngatillugu aallarniutaavoq.

3.1. Oqartussaaffimmik killiliineq

Aalajangiiffigisassatut siunnersuummik siullermeerinermi oqaatigineqartutut siunnersuisooqatigiinnut, aalajangiisartutut ataatsimiititalianut ataatsimiititalianullu atuutereersunut ileqqussaasunik siunnersuisooqatigiit atuunnermini suliaasaasalu naapertuunnissaat pingaaruteqarpoq, taamaalilluni ileqqussaasunik siunnersuisooqatigiit atuunneranni ersarluttumik pilersoqaqqunagu, kiisalu ileqqussaasunik siunnersuisooqatigiinnit allat oqartussaaffiinnut oqartussaaffinnullu pingaarutilinnut naapertuutinnigsumik toqqaannartumik aporaattoqannginniassammat.

Siunnersuisooqatigiit, aalajangiisartutut ataatsimiititaliat nunatsinnullu ataatsimiititaliaq eqqarsaatigalugit oqartussaaffeqarnermut tunngatillugu killilimmik attuumassuteqartut tamakkiisumik allattorsimangitsut ataatsimiititaliap tunngaviusumik makku oqaatigissavai:

- Kalaallit Nunaanni Pinerluttulerinermi pinaveersaartitsinermut Siunnersuisooqatigiit
- Naligiissitaanermut siunnersuisooqatigiit
- Meeqqat pillugit Siunnersuisooqatigiit
- Naartuersittarneq pillugu Naammagittaalliuteqartarfik

- Imigassaq Ikiaroorartorlu pillugit Siunnersuisooqatigiit
- Kalaallit Nunaanni Inuit Pisinnaatitaaffii pillugit Siunnersuisooqatigiit
- Ilisimatusarnermut Siunnersuisooqatigiit
- Ilisimatuussutsikkut Ileqqussaasut pillugit Ataatsimiititaliaq il.il.

Inatsisissatut siunnersuummik suliaqarnerup ingerlannerani siunnersuisooqatigiit, aalajangiisartutut ataatsimiititaliaq aamma ataatsimiititaliaq kiisalu allamik inatsiseqarsimappat oqartussaaffiit atuuffiilu pillugit naliliivigineqartussanik sukumiinerusumik qulaajaasoqartariaqarpoq.

Ileqqussaasunik siunnersuisooqatigiit atuuffissaat oqartussaaffiilu eqqarsaatigalugit killiliinerit atuutereersut saniatigut ileqqussaasunik siunnersuisooqatigiinnik pilersitsiniarnermi siunnersuisooqatigiinni, aalajangiisartunilu ataatsimiititaliami aamma ataatsimiititaliani pioreersuni isumassarsiorfiginissaat nutaamillu eqqarsalersitsisinnaanerat Ilaqutariinnermut Peqqissutsimullu Ataatsimiititaliamit ammaffigineqarpoq, taamaaliornikkut siunnersuisooqatigiinnut aalajangiisartutut ataatsimiititaliami aamma ataatsimiititalianut pioreersunut ataatsimoortinneqalersinnaanerat qanoq naapertuutsiginersoq naliliivigineqarsinnaaqqullugu. Nunatsinni pissutsit aaqqissuussaanerillu uninngaannartuunnginneri nunattali ineriartornerani eqeersimaartuusariaqarneq pisariaqartitanullu naleqqussarnissaq matumani ataatsimut nassuerutigineqarluni.

3.2. Ileqqussaasunik siunnersuisooqatigiiffiup atuuffia

Nunatsinni ileqqussaasunik siunnersuisooqatigiinnik pilersitsineq naliliinerlu tamakkiisuunngitsoq aammalu suliffeqarfinnut immikkoortunut ileqqussaasunik siunnersuisooqatigiinnik aalajangersaunerunngitsoq ataatsimiititaliamit ilisimaneqarpoq, inatsisiliornerulli ingerlateqqinneqarneranut atatillugu politikkikkut tikkuussisutit isigineqarsinnaalluni.

Ileqqussaasunik siunnersuisooqatigiit inuiaqatigiinni ileqqunut ileqqutoqqanullu attuumassuteqartut paquminartut sammineqartarnissaat ataatsimiititaliamit tapersorsorneqarpoq.

Ileqqorissaarnissat inuiaqatigiinnut attuumassuteqartut, inooqataanermit attuumassuteqartunut matumani ilanngullugu atugarissaarnissamik ileqqunut Ileqqussaasunik siunnersuisooqatigiit ilanngunneqartariaqartut matumani ataatsimiititaliaq isumaqarpoq.

Ileqqussaasunik siunnersuisooqatigiit sammisassaata tassaassasut apeqqutit ileqqorissarnermut tunngassuteqartut, peqqinnissaqarfimmut attuumassuteqartut, soorluttaaq peqqinnissamut katsorsaanermilu ileqqorissaarnerit kiisalu napparsimasunut ileqqorissaarnissat napparsimasunullu naleqartitsinernut tunngasut ataatsimiititaliaq ilanngullugu isumaqarpoq.

Innuttaasut pinngortitamik inooqateqarnerannut, nunatsinni innuttaasut inuuniarnermikkut atugaasa ilisarnaataannut allanullu soorlu kultureqarnermut kinaassutsimullu tunngasunut atatillugu ileqqorissaarnissaq pillugu siunnersuisooqatigiit nunatsinni ileqqussanik suliaqarnissaq isumagisariaqaraat ataatsimiititaliaq ingerlaqqilluni isumaqarpoq. Apeqqutit ileqqorissaarnermut tunngasut pinngortitamut avatangiisinullu tunngasuni ajornartorsiutit innuttaasunut annertuumik inuuniarnikkut tunngaviliisut ileqqussaasunik siunnersuisooqatigiinnit aamma ilaatinneqarnissaat ataatsimiititaliamit taamaalilluni ammaffigineqarpoq.

3.3. Ileqqussaasunik siunnersuisooqatigiit suliassaat pingaarnert

Nunatsinnut tunngasuni ileqqussaasunik siunnersuisooqatigiit suliassaat pingaarnert marluk ataani allassimasut isumagineqarnerat ataatsimiititaliap nakkutigissavaa:

- 1) Ileqqussaasunik siunnersuisooqatigiit Inatsisartunut, Naalackersuisunut aamma pisortat oqartussaaffiitut allanut pisariaqartitsineq naapertorlugu siunnersuisassaaq.
- 2) Ileqqussaasunik siunnersuisooqatigiit nunatsinni paasisitsiniaanermik oqallinnernillu siursaassaaq, taamaaliornikkut tamanna ileqqorissarluni oqallinnerni, ileqqorissaarnermik piginnaasaqarnissamut ileqqorissaarnermillu ilisimasaqarnissamut siursaataallunilu uummarissaataasinnaaqullugu.

Ileqqussaasunik siunnersuisooqatigiit suliassaasa sukumiinerusumik nassuiarneqarnissaa aallaavigalugu susasaqartut allat soqutigisaqartullu suleqatigalugit ileqqussaasunik siunnersuisooqatigiit suleqateqarsinnaanerat periarfissaasariaqarpoq, taamatutaaq siunnersuisooqatigiit allat, aalajangiisartullu, sammineqartunut qulequttanullu ataatsimut soqutigisaqarfigineqartunut eqqumaffigineqartunullu tunngatillugu pisuunnguallaataasumik oqallinnernik pilersitsinissamut periarfissaqarnissaq eqqarsaatigalugu.

Ataatsimiititaliaq naapertorlugu ileqqussaasunik siunnersuisooqatigiit Inatsisartunut Naalackersuisunullu ukiumoortumik nalunaarusiortassapput.

3.4. Katitigaanera

Ileqqussaasunik siunnersuisooqatigiit ilaasortaasa katitigaanissaanik ilaasortallu piginnaasaqarfiitut tunngatillugu siunnersuuteqartup pineqartumi siunnersuutigisaa Ilaqutariinnermut Peqqissutsimullu Ataatsimiititaliamit pissanganartutut isumaqarfigineqarpoq, taamaakkaluartorli ilaasortat amerlassusaat taakkulu sulianik ilisimasaqarnissaat ilisimasaallu suliffeqarfiup, suliasaanut, atuuffianut aamma ileqqussaasunik siunnersuisooqatigiit pisariaqartitaannut ataqatigiissaarneqartariaqarput,

taamaaliornikkut naggataatigut ileqqussaasunik siunnersuisooqatigiit naleqqussarlugu ilusilersorneqarsinnaaqqullugu.

Ileqqussaasunik siunnersuisooqatigiit paasisimasaqarluartunik immikkullu ilisimasalinnik aamma ilisimasassanik pissarsiniarnissaminut periarfissaqartariaqarpoq. Piorsarlugu aallartinneraniit oqaatsitigut taaguutit ileqqorissaarnissamut eqqarsarnermut atatillugu Kalaallit Nunaanni Oqaasiliortut suleqatiginissaat assersuutigalugu pisariaqassaaq. Nunatsinni sumiiffiit nunaqarfiillu ilaanni ileqqutoqqanik, oqaatsinik, kulturimik inooriaatsimillu immikkoorutilinnik ileqqussaasunik siunnersuisooqatigiit atorsinnaasaannik naammattuuisoqarsinnaasoq mattunneqarsinnaanngilaq, soorlu siunnersuummik siullermeerinermi tamanna ersarissarneqartoq. Taamaattumik piginnaasat kultureqarnikkut paasisimasaqarnermik, matumani oqaatsinik paasisimasaqarneq nunatsinni ileqqussaasunik siunnersuisooqatigiinni aallaaveqartariaqarput, taamaaliornikkut nunatsinni ileqqussaasunik siunnersuisooqatigiit atunnerat inuiaqatigiinni ikkutivinneqarnissaa qulakkeerneqarsinnaaqqullugu.

3.5. Aningaasarsiat

Ileqqussaasunik siunnersuisooqatigiinni ilaasortat akissarsiaqartinneqarnissaat pillugu apeqqut siullermeerinermi eqqartorneqarpoq. Tamanna pillugu apeqqut suliarinninnermi matumani tamakkiisuunngitsumik qulaajarneqarsinnaasoq ataatsimiititaliamit aammaarlugu erseqqissaatigineqassaaq.

Taamaakkaluartoq siunnersuisooqatigiinnut aalajangiisartutullu ataatsimiititalianut sanillersuunneqarsinnaasunut ilaasortat assigalugit ileqqussaasunik siunnersuisooqatigiinni ilaasortat kiisalu ileqqussaasunik siunnersuisooqatigiinni sulianut ersersitsisumik aningaasarsialerneqarsinnaanerata ataatsimiititaliamit takorloorneqarpoq.

3.6. Allaffeqarfik

Ileqqussaasunik siunnersuisooqatigiit arlaannaannulluunniit attuumassuteqanngitsumut allaffeqarfirmut attuumassuteqartariaqarpoq, annertussusaa katitigaaneralu ileqqussaasunik siunnersuisooqatigiit suliassaqarfiinut naapertuuttumik.

3.7. Politikkikkut arlaannaannulluunniit attuumassuteqannginneq

Akuerineqarnerunissaq angujumallugu matumanilu ilanngullugu siunnersuineramik ingerlatsinissaq, oqallitsitsinermik, piginnaasanik ineriartortitsinermik paasissutissiisussatullu inissisimanissap isumaginissaat eqqarsaatigalugit ileqqussaasunik siunnersuisooqatigiit eqqarsaatigilluakkamik politikkikkut arlaannaannulluunniit attuumassuteqannginnissaa pingaaruteqarpoq.

Ileqqussaasunik siunnersuisooqatigiit ilaasortassaanik toqqaarneq
Naalakkersuisuninngaanniissasoq siunnersuuteqartup siunnersuummi oqaatigaa.

Ileqqussaasunik siunnersuisooqatigiit politikikkut arlaannaannulluunniit attuumassuteqannginnissaata qulakkeerneqarnissaa pillugu politikikkut kissaatigineqarluni saqqummiunneqartoq eqqarsaatigalugu toqqaasarnermut apeqqut ataatsimiititaliamit eqqartorneqarpoq.

Ileqqussaasunik siunnersuisooqatigiit ilaasortassaanik toqqaasarnerup ilusilersugaanissaa siunnersuuteqartup siunnersuutigisaanit annertunerusumik politikikkut arlaannaannulluunniit attuumassuteqannginnerunissaa ataatsimiititaliamit kissaatigineqarpoq.

Ileqqussaasunik siunnersuisooqatigiit ilaasortassaanik Naalakkersuisut aamma immaqa Inatsisartut kisimik toqqaasarnissaat **innersuussuteqarneq** tunngavigalugu maleruagassiornissami piumasarineqarsinnaavoq, soorluttaaq soqutigisaqatigiinneersunik, kattuffinneersunik, peqatigiiffinninngaanneersunik, suliniaqatigiiffinneersunik assigisaanniillu ilaasortassanik toqqaasarnissaq pisinnaasoq.

Inatsisissatut siunnersuutissami ileqqussaasunik siunnersuisooqatigiit politikikkut arlaannaannulluunniit attuumassuteqanngitsutut suliffeqarfittulluunniit arlaannaannulluunniit attuumassuteqanngitsutut inassisimanissaa ilanngullugu allanneqarsimassaaq.

Aammattaaq inatsisissatut siunnersuummi ilanngullugu allanneqarsinnaavoq ileqqussaasunik siunnersuisooqatigiinnut ilaasortat Inatsisartunut, Naalakkersuisunut, Kommunalbestyrelsimut nunaqarfinnullu aqutsisunut ilaasortaassanngitsut.

Ileqqussaasunik siunnersuisooqatigiiffiup aningaasaqarnera eqqarsaatigalugu atuunnermini aningaasaqarnermut inatsimmit aningaasalersorneqarnermi nalaani, tamakkiisumik politikikkut arlaannaannulluunniit attuumassuteqassanngilaq, ukiumoortumik aningaasanut inatsimmi aningaasaliissutinut Inatsisartut aalajangersaasartuummata.

Inatsisissatut siunnersuutissamat tunngatillugu ileqqussaasunik siunnersuisooqatigiit katitigaanerat angutit arnallu siulittaasorlu naligiissinneqarlutik ilaasortaasarnissaat qanoq qulakkeerneqarsinnaanersoq eqqarsaatigeqqullugu ataatsimiititaliamit kaammattuutigineqassaaq, taamaaliornikkut Meeqqat Oqaaseqartartuat pillugu inatsisissatut siunnersuummut isumaliutissiisummi oqaasertalerneqarnera assigalugu arnaq angullu nikittaassinnaasut, taamaaliornikkut Naligiissitaanermut Inatsimmi tunngavigineqartut qimerloorneqarsinnaallutik.

Sulisut aaqqissugaaneralu politikikkut sulialinnit ilaasortaaffigineqannginnissaata patajaallisarneqarnissaa, taamaalillunilu politikikkut sulinermi arlaannaannulluunniit attuumassuteqartussaannginnera assortuussutaannginnissaa ataatsimut isigalugu pingaaruteqartoq ataatsimiititaliaq isumaqarpoq.

4. Siunnersuutip aningaasatigut kingunerisassai

Inatsisartut Suleriaasianni § 33, imm. 1-imi allassimavoq aalajangiiffigisassatut siunnersuutigisap piviusunnigortinneqarnerani aningaasatigut allaffissornikkullu kingunerisassat siunnersuummi tunngavilersuutitut allanneqarsimassasut.


Siunnersuutip piviusunnigortinneqarnerani siunnersuutigineqartup aningaasatigut kingunerisassai naapertorlugit tagginneqartut ataatsimiititaliamit maluginiarneqarpoq, taamaalilluni inatsisissamut siunnersuusiorneq 500.000 kr.-inik akeqassalluni. Siunnersuut tapersorneqassappat ileqqussaasunik siunnersuisooqatigiit ingerlaneqarnerannut suliaqarnerannullu 2019-imiit ukiumut 900.000 kr.-it immikkoortinneqartarnissaat, politikikkullu angorusutat amerlanerussappata aningaasat amerlanerusut aammalu ileqqussaasunut siunnersuisooqatigiit ilusilersugaanerata siuarsarneqarnissaat kissaatigineqassappat aningaasaliissutit amerlanerunissaat siunnersuuteqartut naatsorsuutigaa.

Oqaatigineqartut pillugit ataatsimut ataatsimiititaliamit tusaatissatut tiguneqarput, ilanngulluguli uparuarlugu nunatsinnut ileqqussaasunik siunnersuisooqatigiinnut tunngatillugu maleruagassiornerup aningaasaqarnikkut allaffissornikkullu kingunerisassai inatsisissatut siunnersuutip saqqummiunneqartup inaarutaasumik naliliivigineqarnissaa apeqqutaajumaarmat.

5. Ataatsimiititaliap inassuteqaatai

Siunnersuut ilusimisut iluseqartillugu akuerineqassasoq ataatsimiititaliap inassutigaa.

Taama oqaaseqarluni isumaliutissiisummilu oqaatigineqartutut paasinnilluni siunnersuut Ilaqutariinnermut Peqqissutsimullu ataatsimiititaliap aappassaaniigassanngortippaa.




Laura Táunâjik
Siulittaasoq




Nivi Olsen



Jess Svane



Mala Høy Kuko



Aaja Chemnitz Larsen



Peter Olsen



Bendt B. Kristiansen